

■ TOP POP RUMANTSCH

Radio Rumantsch preschenta: Ils bulais – mias s-charpas

(rtr/jp) Ils 25 da favrer ha il Radio Rumantsch (RR) lantschà il project TOP POP RUMANTSCH cun la chanzun «sorry baby (quei vul dir perstgisa)» da Susanna Sabbadini. Cun quest project vules il RR promover la scena da musica rumantscha – ed augmentar ses repertori da musica rumantscha, spezialmain musica moderna producida sin aut nivel.

La segunda produziun ch'ins po tadlar a partir dad immediat tar il RR è ina chanzun dals «bulais», ina band engiadinaisa ch'exista gia dapi 1992 e che ha ediplirs discs cumpacts cun rock rumantsch. La band sa cumpona dad *Olivier Pernet*, piano e chant, e *Corsin Bisaz*, ghitarra.

Il text da la chanzun «mias s-charpas» è ina poesia da *Rut Plouda*. Responsabel per la produziun èn *Benedetto Vigne* sco cussegliaader musical e *Manfred Zazzi* dal studio da tun Apart. Mix: *Phil Erdin* da Sonar Sound.

L'istorgia dals «bulais»

Ils «bulais» èn in grappa da rock rumantscha che sa cumpona actualmain da quatter musicists. Lur texts da chanzuns

èn senza excepziun rumantschs. Ils «bulais» fan dapi divers onns part da la «crema» da la scena dal rock rumantsch. Il 1992 è la band vegnida fundada da tschintg gimnasiasts a l'Institut Otalpin a Ftan. L'emprim num da la band: «bulais sexuals». A partir da quel onn han els dà numerus concerts en Svizra sco er en l'exteriur cunfinant. Els han realisà duas singles, duas albums ed in clip da video. Singuls da lur concerts èn vegnids emess live dal Radio Rumantsch. Ils concerts sco er ils discs cumpacts han survegnì buonas criticas en las medias.

Oz sa numna la band mo pli «bulais» La midada dal num è stada necessaria perquai ch'èn Svizra tudestga vegniva cun il num vegl associà tut insatge auter ch'èn Rumantschia. Rumantschas e Rumantschs collian il pled «sexuals» cun adjectivs sco simpatic, original e forsa er comic. Tar la glieud da lingua tudestga devi difficultads cun la pronunzia dal pled («sexuals» vegniva pronunzià en englais.) Plinavant svegliava il pled magari faussas aspectativas – er da quellas na musicalas. Perquai be pli «bulais» – cun u senza tisi, tgi sa?

Il stil da musica dals «bulais» è in rock pop cun elements da jazz, blues e soul che po sumegliar al «Mundartrock» da diversas bands svizas. Ils texts èn dentant adina rumantschs. La musica parta dal piano e vegn accompagnada dad ina ghitarra bluesca. Il chant regorda a Joe Cocker ed a Herbert Grönemeyer. Bateria e bass dattan in fundament groovus. Quai che caracterisescha er ils «bulais» è lur plaschair vi dal far musica, saja quai durant las provas u als concerts.

Statements dals «bulais»

«Dasper il plaschair vi dal far musica vaina eir amo ün böt ideal: Nus lain cumprovar cha la lingua rumantscha nu fa be puolvra in bibliotecas e vi da fatschadas da chasas, mabain ch'ella viva, e co!»

«Per cha la lingua rumantscha possa viver e survivor sto gnir cultivà seis nom e seis purtret in special pro la generaziun giuvna. Nus sperain da pudair contribuir cun nossa musica üna pitschna part per rinfras-char nossa lingua.»

Ulteriuras infurmaziuns e la pussaivladad d'udir la chanzun sin: www.rtr.ch



Ils bulais: Olivier Pernet (chant/tastas) – Corsin Bisaz (ghitara).